



# Դանիել Վարուժան

## Առաջին ծիլեր

Ջեղուն ավշին հողերուն տակ պայթեցուց  
Սերմերն: Արտերս այս գիշեր  
Կանանչցեր են լուսնկային տակ գարնան...  
– Մայրի՛կ, ինձի ծիլ մը բեր,  
Քըրտինքիս ցողը վըրան:

Կատաղորե՛ն, կատաղորե՛ն հորդեր են  
Տե՛ս, ցորեններն աղածրի:  
Դաշտերն հագեր են գմբուխտե պատմուճան...  
– Քույրի՛կ, ծիլ մը բեր ինձի,  
Եզիս շողիքը վըրան:

Կը փողփողին արտավարե արտավար  
Կարծես կանանչ մոմիկներ:  
Ամեն ընձյուղ մարգրիտ մ'ունի իր բերանն...  
– Հոտա՛ղ, ինձի ծիլ մը բեր,  
Արևուն շողը վըրան:

Կը զարդարե ամայությունը հողին  
Մատղաշ ծաղի՛կը հացի.  
Կանանչին մեջ կոշտերը թուխ կը լողան...  
– Հարսնո՛ւկ, ծիլ մը բեր ինձի,  
Մատերուդ բույրը վըրան:

Ծիլ արտերուս մեջն է ծըլեր նըշենիս,  
Հոն միսմինա՛կը ծաղկեր...

– Մայրի՛կ, քույրի՛կ, հոտա՛ղ, հարսնո՛ւկ սիրական,  
Բերեք անկե ծաղիկներ,  
Բերեք վարդգույն ծաղիկներ,  
Հընձվորին հո՛ւյսը վըրան: